

Was merr su babbeld

Honnes, was suchsden in dere Schublad?
E Plassder.
Ferr was donn e Plassder?
Isch habb mich geschnidde.
Ei wo donn? Zeich emol her.
Hier, omm Finger.
Wie hosden dess geschaffd?
Merr soll joo nix schaffe. Ei im Gadde.
Im Gadde. Meddem Messer?
Naa, onn su emm scharfe Blummeblatt.
Isch habb derr immer gesaad ...
Ja, ja. Wo issen dess Plassder, ich finns nitt.
Doo vorne leit doch dess Päcksche.
Ei ja. Doo iss awwer nitt mieh vill droi.
Ferr heit werrds longe. Gebb emol her.
Au.
Stell dich nitt su oo. Ferrdisch.
Donkeschee. Merr misse Plassder mettbrenge.
Ja. Isch schreibs uff.
Schreib aach Hiehneraacheplassder uff.
Vunn dem hawwe merr noch genuch. Hier.
Doo konnsde merr oons uff die Fieß mache.
Wo hosden e Hiehneraache?
Unne omm reschde Fuß.
Uff de Fußsohl?
Ja. Zimmlich vorne.
Zieh mol doin Schtrumb aus.
Doo unne isses.
Isch sehs. Hosde die Fieß gewäsche?
Ei was denksden du.
Komm, donn mache merr dess gleich.
Au. Was dricksden druff erum?
Doo iss enn Stachel droi.
Dess Plassder mächt den waasch.
Dess Plassder haddsde schunn effder.
Unn dess hott merr immer geholfe.
Wadde mol, isch holl noch e Stick Leukoplast.
Warum donn dess?
Doo hältts uff de Fußsohl besser. Su. Ferrdisch.
Donkeschee.
Nix ze donke, Fuffzeh Euro.
Wie, fuffzeh Euro?
Dess häts bestimmt gekost, wennde ...
Wenn isch bei die Fußpflaesch gewese wär?

Honne440

Ja. Awwer was mächt merr nitt alles.
Dess stimmt.
Wie? Koo Widderredd heit?
Naa, heit nitt.
Hosde derr ebbes vorge numme?
Ja.
Unn was donn?
Isch heb merr die Widerredd uff.
Unn ferr was?
Ferr doi Frooch moie.
Ferr was ferr Frooch?
Ob isch nitt gern widder mol medder ins Main-
Taunus-Zentrum fahrn wolt.

Eiern Honnes